



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 3 Yangia anidakangma :

Tir Yimym

tiryimym@aolima

tir yimym

TAPAK 8

BJP-i linük nung ochimashi samatsütsü atema inyaksü

AIFF-i Technical Director asütsü Syed Sabir Pasha shimogo



VOL. XX NO. 175 (ADOK 175) DIMAPUR

ROGONÜ (FRIDAY)

RONGCHII (APRIL) 07, 2023

₹ 5.00

GOOD FRIDAY SODI

Alima meimchirtem temenen nungi kümzüksü asoshi Yisu Khrista asüba anogo bilemteta amongba 'Good Friday' anogo nung sarasadema amongtsü asoshi Tir Yimym office tanü April 7, 2023 nü shibanger, anungji April 8, 2023 Tir Yimym adok malitsü.
- Ketdangsür, Tir Yimym.

Gol aser NSCN (NK), (R) aser (K-Khango) tsüngta CF atsülanger

Dimapur, Rongchii/April 06 (TYO): Government of India (GoI) aser National Socialist Council of Nagaland/NK (NSCN/NK), National Socialist Council of Nagaland/Reformation (NSCN/R) aser National Socialist Council of Nagaland/K-Khango (NSCN/K-Khango) tsüngta Ceasefire Agreements tang tashi lir, ta April 6, 2023 nü Government of India

sangdong ka ajanga ashi. Ano NSCN/NK aser NSCN/R den Ceasefire Agreements ya April 28, 2023 nungi April 27, 2024 (küm ka) atsülangtsü aser NSCN/K-Khango den April 18, 2023 nungi April 17, 2023 tashi atsülangtsü teletmetba agi, ta sangdong ajanga ashi.

Iba tezüngzüktep ya April 6, 2023 nü zülutepa liasü, ta ashi.

State sorkari tim masüba mapa inyak: NMA

Dimapur, Rongchii/April 06 (TYO): State sorkar indang temaba ketdangsür temi April 6, 2023 nü Hotel De Oriental Grand, Kohima nung tim masüba mapa inyakba khukhua aitsür, ta Naga Mothers' Association (NMA) sangdong ka ajanga ashi.

Onoki aji memolung, kechiaser iba senden asoshi onok jaoka liasü aser onoki ajurutsü asüngdangba masü. Tatema German Consul General Manfred Auster ya lobby bushia adok aser sorkari senden mamentsüsa timtem agütsüba asoshi tatok meshi. Onoki hotel lobby nung police aser G20 staff temi lungbanger lia state nung tensa balala indang lemsatepteta liasü, ta NMA ajanga ashi.

State Women Commission indang taoba züngsemtem dener aliba tetsür delegations dang iba ama yimya tamajung sayuba aser akumtsübo masüba atema jashir, ta NMA-i ashi.

NMA ya tetsür asoshi project ka atema sensaksem akatsü liasü, koba Consul General den taoba December nunga lemsateper liasü.

State sorkari bendang linük nungi lenirtem yamai amshia senotsü indoktsü aser teyari atema jembishinüba nokdangra, state nung G20 aser B20 Summits ayogzükba nükjildong chichibaji kechi, ta NMA sangdong ajangasa asüngdang.

Naga Mothers Association ya tejangja lokti tentet ka masü: APO

Kohima, Rongchii/April 06 (TYO): Angami Public Organisation (APO) ajanga state sorkar dangi shiti ka züluba nung, Naga nung rongnung tepenja madokdaksütsü mechi lokti aser yimten ken o jembishinüba nung shingaia tashi agüja maliba Naga Mothers' Association (NMA) nungi pila alitsü mepishir, ta shia liasü.

ketdangsür balala ajurua senzüba aser senden aser seminar balala ayongzükba arok tejangraba dak sendakba nung pangzüng yangluba ngua temolung shiranger aser tip matemer, ta ashi.

Ochiji ya lir, NMA ya akhi mapang nungi anenadokogo aser parnok den Angami Women Organization (AWO) maden, anungji kecha yimya nunga parnok tejangja lokti tentet ka ta mesayur, ta APO-i ashi.

Anungji item lenirtemi ashiba ama kechi inyakdir itemji par jurila tejangraba atema inyaker, kechiaser Nagaland state nung aliba tetsürtem temoatsü parnok den mali, ta ashi.

Nüburtemi aginüba ta aser lokti tenüng amer nisung kar dak tensa tali tuluba kumdaksütsü yimya bena lir aser item rongnung tang aliba NMA lenirtem ya ka lir, ta APO ajanga ashi.

Tang aliba NMA lenirtem ya pei sasa shimba nisung kar dang lir aser Naga women tribal body temi bukumba aser molungba masü, anungji parnok ya lokti tentet tejangja ka masü, ta APO ajanga April 6, 2023 nü Nagaland Chief Secretary, J. Alam, IAS dangi züluba shiti nung shia lir.

"Parnok dak tamang akatsü mali aser kechi nungsa südir süaka parnok dak tashi maka ta sangdongtsüla," ta ashi.

Angami tsür kar NMA lenir ama

Business Association of Nagas aser IBCCI tsüngta MoU ka zülutep



Niathu Resort, Dimapur nung April 6, 2023 nü India-Bangladesh Chamber of Commerce and Industry (IBCCI) aser Business Association of Nagas (BAN) tsüngta Memorandum of Understanding (MoU) ka zülutepba sülen tangokba noksa nung angur.

Dimapur, Rongchii/April 06 (TYO): India-Bangladesh Chamber of Commerce and Industry (IBCCI) aser Business Association of Nagas (BAN) tsüngta shishilempaba tsütsü amalitep akatsü, kati ka ajungkettsü, yariteptsü aser lungjemer inyaksü nükjildong nung tir Abdul Matlub Ahmad-i anir IBCCI aser tir Mongkum Jamir-i anir BAN tsüngta Memorandum of Understanding (MoU) ka April 6, 2023 nü Niathu Resort, Dimapur nung zülutepa liasü.

Kohima nung B20 Summit amenba sülen item nükjildong yur iba MoU ya zülutepa liasü:

1. Aluyimba, chiyongtsü yangluba, süngkum, tourism, textiles, IT services, mineral aser renewable energy amala nung osangtsüsang, expertise aser technology lemsatepba nung yaritsü.

2. Bangladesh aser Nagaland tsüngta shishilempaba aser investment tsütsü tmaba jenjang nung ajungkettsü.

3. Shishilempaba aser

investment tesendaktep ali tajungba kumdaksütsü asoshi shishilempar nem nungdakba teyari agütsütsü.

4. Linük ana lungjemer project balala inyaksü molungtep.

5. Shishilempaba tsütsü tetsükdaksü alibatam ajemdaksütsü asoshi inyaksü aser anatsülen indang goods & services atema market access tajungba kumdaksütsü asoshi inyaksü.

6. Iba MoU renloka aoba reprangshimtsü asoshi mapang shia senden amentsü aser amalitep akatsü asoshi tali awaloka inyaksü.

Iba senden nung Japan ato kilonser aser India ato kilonser nati Bangladesh nung aliba Matarbari deep sea port tekeratiba nungi amshitsü molungtepogo, ta IBCCI tir Abdul Matlub Ahmad-i ashi.

Government of India indang foreign policy den lirumedema aser state ajungtsü mechi deep-sea port amshitsü ta North East states tem rongnungi

mezüngbuba sangdongtsü pai Nagaland sorkar dang ajungshia liasü.

Paisa Tuli nung acres 700 nung süngkum tsünüa alidak nungi bamboo pulp alitsü tejangraba lemsatepa liasü.

Tuli Paper Mill ya tanaben shia arudaksütsü asoshi pai paper mill machinery tasenba nung sen indoktsü jangra aliba lemsatepa liasü.

Linük anaprong ajangzüksü mechi ozü sorkari aluyimba dak sendakba aser danga resources tem ayoktsü aser alitsü tejangraba lir aser Bangladesh nung Sylhet aser Dimapur tsüngta 'direct connecting flight' alinung ajungtsü, ta IBCCI tirisa ashi.

Ola-angla (textile) sector nung Bangladesh-i amokbanger aliba meteta aliyong, BAN tiri IBCCI dang Nagaland nunga textile sector atema sentong tenzüksü asüngdanga liasü aser IBCCI tiri telangzüba tajung agütsü.

Kasa mapang BAN tiria iba MoU tejakleni bener aotsü asoshi akokba nung yariteptsü, ta shia liasü.

Nagaland nung sen crore 4510 indoktsü tejangraba lir

Kohima, Rongchii/April 06 (TYO): Business 20 mungdang alidang national aser international business delegates temi Nagaland nung sen crore 4510 jenjang sector balala nung shishilempatsü tejangraba lemsatepa liasü.

Manipur, Mizoram aser Sikkim densema North East Region (NER) nung G20 Summit aliba nung shilem ka ama Nagaland nung B20 indang senden pezü buba aser tatembangba Bodhbarnü mena liasü.

Iba mungdang nung linük 27 nungi delegates 60 dena liasü.

Ministry of External Affairs kübok Confederation of Indian Industry ajanga achayanga Business to Business (B2B) asr Business to Government (B2G)

senden akaba mapang Nagaland nungi shishilempartem aser sorkar indang department balalai shilem agia liasü, ta Nagaland Home Commissioner, Abhijit Sinha ajanga Brehostibarnü sangdong ka nung ashi.

B2B/B2G nung Nagaland sorkar aser Investors tsüngta renewable energy nung taruba küm asem tsüngta sen crore 1000 indoktsü asoshi Memorandum of Understanding (MoU) zülutepa liasü, ta pai ashi.

B2B/B2G Session nungya shishilempaba tsütsü tejangraba alibatam lemsatepa bio fuels nunga sen crore 1500 tashi indoktsü teimla lir, ta ashi.

Private sector temia health sector nung sen crore 10 shi

alang sen indoktsü jangra aliba sentongtem sapoka jembia liasü, ta pai ashi.

Ano agro and food processing, rubber, MSME, medical tourism, sports aser IT sector tem nunga sen crore 2,000 alang business sentongtem lemsatep aser itemji tali tarokba nung asadanga mapangdong nung inyaksü, ta Home Commissioner-i ashi.

Investment & Development Authority of Nagaland (IDAN) ajanga shishilempar aser sendaktepa aliba department tem den teka amteper sen indoktsü teimla akartem (potential investors) den osang agitepa aser yariteptsü, ta Sinha-i ashi.

(Maneni tapak 2 nung...)

B20 delegates temi Kohima War Cemetery semdang



Dimapur, Rongchii/April 06 (TYO): G20 linüktem nungi B20 Summit nung adentsü arurtemi April 6, 2023 nü Kohima nung aliba Commonwealth War Cemetery semdanga liasü. Iba mapang Indian Association of Japan tir Dr. Sanjay Mehrotra-i osangbender dang ashiba agi, asemnü

senden amendang Nagaland Chief Minister den jangratema sensaksem kaogo, ta ashi. Japan delegation temi talisa fresh drinking water solutions, highway nung street lights aser nüburtsem senzüsempongba ketdangsütsü asoshi Dimapur nungi Kohima tashi monorail ka yanglutsüba nung

ranglokner, ta Mehrotra-i ashi. Paisa chiyongtsü yangluba amala nung kanga jangrar, koba agi Nagaland nung zünger mapa mangu alirtem nem maongka agütsütsü, ta ashi. Naga nunger puti otsü tajungba nung angatdaksütsü nükjidong nung B20 delegates temi Commonwealth War Cemetery ya semdanga liasü.

IIMUN ajanga Kohima nung state level sentong ka ayongtsü

Dimapur, Rongchii/April 06 (TYO): Nagaland Board of School Education ajanga April 6, 2023 nü sangdong ka nung ashiba agi, India's International Movement to Unite Nations (I.I.M.U.N) ajanga Kohima nung aliba G. Rio School nung May 25-27, 2023 anogotem state level conference ka ayongzüksü. IIMUN ya alima nung education conference brand tulutiba lir aser parnoki Mumbai nung World's Largest MUN simulation ayongzükdanga lir. Ajidang masü New York nung aliba United Nations Headquarters telung nung MUN conference aika

ayongzükdangba lokti tentet ibai mezüngbuba lir. O intepba, jembishinü akaba aser mungdang balala ajanga India nunger telokok shisatsü lemsatapa alima lungjema asüng lenir nem India indang angazükdaksütsü nükjidong nung IIMUN ya 2011/12 nung Rishabh Shah-i tenteta liasü. Iba nungya arishi küm 16 nungi 22 tsüngta kaketshir 26,000 lir aser parnoki yimti 220 aser linük 35 nung sentong balala ayongzüka arishi küm 15-19 tain kaketshir crore 5 dak kongshia. IIMUN ajanga kaketshir 7500 nung anogo 3-4 sentong ayongzükter aser iba sülen

takoker tem yimti 220 aser linük 35 nung adenshir aser tatembangba sentong ya Mumbai/UN Headquarter - New York nung alir. School balala nung anogo asem-pepzü sentong ayongzükba nung yariteper IIMUN den kaketshir volunteer 6,000 lir. Iba dak sendakba nung kaketshir reju tem dang IIMUN Nagaland Concourse ajanga jaokba ama kaketshir tem shilem agitsü ajungshir, ta sangdong ajangasa ashi. IIMUN indang tejangja @iimunofficial aser <https://instagram.com/rishabhshah2012/> nung angutsü.

Nagaland Governor-i Good Friday aser Easter Sunday salem abener

Dimapur, Rongchii/April 06 (TYO): Nagaland Governor, La Ganesan-i sangdong ka nung, ajak dangi Good Friday aser Easter Sunday salem abener, ta ashi. Yisu Khrista takum bendanga agütsüba bilemteta aser pa kangki nung metabasa aser asüba asoshi temolung shiranga Good Friday ya amunger. Pa asüba ajanga asenok temenen nungi alanzük aser asen dak metokmeperei liaka tatok angur, ta Governor La Ganesan-i ashi. Yisu tasü nungi shia aruba ya temenen, tashiyim, azüdokshi aser tasüba madak taochi,

temeim, tesunep aser takum indang tashi ajanga takok anguba lir. Easter nung asenoki takok benjongdang asenoki tesem ajaklen timtemer nem teimla agütsüti, temenen nem takok magütsüli, ochi kodanga miimbanga meyuli, kechiaser tajung aser ochi nung nokdaker temi takok angutsü. Anungji asenoki Yisu Khrista takum aser pai sayuba, asüba aser shia aruba ajanga asen ajemalushiti, bendanga agütsüba aser temeim tali amshiti aser pei kibong aser medemertem atema kising masü saka ochi asoshia asenoki bendanga agütsütsü renema liti, ta pai ayongzük.

Nagaland nung 43 buba BJP Foundation Day amung

Dimapur, Rongchii/April 06 (TYO): Linük den külemi Bharatiya Janata Party (BJP) Nagaland State-ia BJP indang 43 buba Foundation Day sentong ka BJP Head Office, Kohima nung April 6, 2023 nü ayongzüka munga liasü. Iba sentong nung BJP state vice president, Kevidezo Peter Rutsa-i party indang nisan asong, kong BJP state ketdangpur, State Morchas aser BJP Kohima District nungi dena liasü.

Iba sentong nung BJP Legislator tem nungi Imkong L. Imchen, Er.Kropol Vitsu aser Pangjung Jamir nungertem dena liasü. 43 buba BJP Foundation Day ya Nagaland kübok district balala aser Mandal 60 prong nung munga liasü. Iba anogomung nung India Ato Kilonser Narendra Modi-i jembiba 'live broadcast;' asü, koba state head office, Kohima nung repranga liasü.

Nagaland Governor-i Khonoma semdang



Nagaland Governor La Ganesan-i April 6, 2023 nü Khonoma nung aliba tajemtsü tzü bendena ayudak tesem semdangba noksa nung angur.

Dimapur, Rongchii/April 06 (TYO): Nagaland Governor La Ganesan-i April 6, 2023 nü India aser Asia nung mezüngbuba 'Green village', Khonoma semdanga Community Hall Terhotsiese, Khonoma nung sentong ka agia liasü. Iba sentong nung jembidang, Khonoma village ya kanga tia taka, kechiaser Tsüngremi tebour tajung tesem aser süngdong-lidong teperi agütsü, ta Governor-i ashi. Nüburtemi sorkar nungi kechi aginer aji metettsü atema ni iba tesem semdang, ta pai ashi aser nüburtsem dang sorkar dang lenmang, kaketshir reju, mozüki, bank aser yamala nungdakattem meshitsü ayongzüka liasü. Nüburtsem ajangzüksü asoshi central sorkari schemes/project balala agütsür, anungji nenoki sorkar dang nenok nungdakba meshitsüla, ta pai ashi. State nung terenlok maparen dak sendakba nung ni Chief

Minister Neiphu Rio den jembitsü, ta Governor-i ashi. Khonoma nüburtemi temi tajungtiba nung pa agizükba asoshia Governor-i pelaba lemsatapa aser parnoki arem wazüka ayuba atema tenüngsang agüja liasü. Iba sülen pai tesem balala penzüba, Hiekha Morung aser NSF Memorial amala tesemtem semdanga liasü. Governo meina C&S to Raj Bhavan, Wezope Kenye IAS; SDO (Civil) Sechu Zubza, Tiayanger Jamir aser Raj Bhavan nung ketdangsürttem arua liasü. Khonoma village council chairman & KNCTS Kezhaserie Meyase-i Governor dang Khonoma semdangba asoshi pelaba lemsatapa aser yimtsüng indang puti otsü balala tongmelang agi shia liasü. Sentong nung menden Ronald Rokosekho Meru liasü, Rev. Father Vizo ajanga Tsüngrem temoatsü meshia sarasadem aser Huzo Mezu-i melepzüng o jembia liasü.

Kohima Police-i nokdanga aliba 'cough syrup' aika apu



Dimapur, Rongchii/April 06 (TYO): Khuzama inter-state check gate nüka aliba Kohima Police temi April 5, 2023 anüngdang 1:30 ako meta akhi ama gari tem anema mita aoba mapang gari ka (Tata Yodha, regd. No.NL-07-AA0321) nungi nokdanga aliba aketdang ajemba mozü (cough syrup) bottle 997 nguteta liasü, ta Kohima Police sangdong ka ajanga ashi. Iba dak sendakba nung police temi arishi küm 25 tain Ashikur Islam apu aser nokdanga aliba mozü den gari ya apu. Iba sülen maneni bushisüngdangtsü mechi NDPS Act kübok ken o ka Khuzama Police Station nung benoka lir, ta sangdong ajangasa ashi.

Nagaland nung sen crore 4510 indoktsü... (Tapak 1 nungi...)

State sorkari maneni Ministry of DoNER, DPIIT aser Invest India teyari nung maparen balala inyaksü aser Industrial associations aser tim stakeholders temi item business interests ya asangsang kumdaksüba nung yariteptsü, ta pai ashi. DoNER Ministry aser DPIIT (Department for Promotion of Industry and Internal Trade) ajanga ayongzükba NE Global Investment Summit mapang state-i North East Industrial Development Scheme (NEIDS)

tasenba atema 'policy recommendations' agütsüogo, koba ajanga shishilempatsü sentongtem tekeratiba nung asangsang akumtsü aser state nung shishilempaba yimya tajungtiba nung renloktsü, ta Home Commissioner-i ashi. Kasa mapang Advisor to Chief Minister aser IDAN Chairman, Abu Metha-ia tweets kar nung, Eden Medical Centre den lungjemer MRI facility & Blood Bank amenoktsü atema Poonawala Group ajanga sen

crore 10 indang project ka nung meyongnem agütsüogo, ta ashi. Renewable Energy nung sen crore 1000 jenjang investment atema Thompson Computing & Semiconductors India Pvt. Ltd. den MoU ka zülutepba pai sangdonga liasü. State nung süngkum nung ajemdaker sen crore 1,500 jenjang ethanol production plant amenoktsü asoshi Numaligarh Refineries ajanga Letter of Intent ka agütsüogo, ta Abu Metha-isa tweet asü.

**GOVERNMENT OF NAGALAND
DIRECTORATE OF SCHOOL EDUCATION**

KOHIMA, NAGALAND

NOTIFICATION

Kohima, dated the 4th April 2023

No. ED/NL/GT-SL/2020/ : In continuation of this Office Order of even number dated Kohima the 9th November 2022, eligible Graduate Teachers in the Graduate Teacher Seniority List 2022 from S.No. 1-750 who have failed to submit documents in the recent Departmental documents verification process are hereby reminded to appear physically with all necessary documents viz. Annual Performance Assessment Report (APAR) of last five years, 1st Appointment Order, Regularization Order, Service Confirmation Order, grant of GT Scale Order, B.Ed. Admit Card, Mark Sheet and Pass Certificate on 11th & 12th April 2023 at Room No-2, Planning Section, Directorate of School Education, Kohima, Nagaland.

Failure to comply will be construed as being ineligible for promotion and no claims will be entertained on expiry of stipulated dates mentioned above.

**(THAVASEELANK) IAS
Principal Director**

BJP-i linük nung ochimashi samatsütsü atema inyaksü: PM Modi

New Delhi, April 06 (Agencies): Brihostibarnü BJP pur 44buba Foundation Day anogomong nung party nung inyakterem den jembidang Ato kilonser, Narendra Modi-i, India nung ochimashi samatsütsü aser kinünger tejak repranga inyakba samatsütsü atema sorkari meranga inyaker, ta metetdaksü.

Modi-i, "Tanü asenoki asen party foundation day amonger. Tetsü India tenzütsü atema bendanga agütsür BJP nung inyaker ajak nem ni tenüngsang agütsür," ta ashi.

Congress party aija Modi-i, "tamarener" melungsentsü denner parnoki sensakertem

asere backward nübertem mezüngmeshia aruogo, ta metetdaksü.

"Yimtenren party aikati loktiliba temeden tenüng amer linük den asaya-a aruogo. Parnoki nübertem atema masü saka parnok kibongtem atema dang inyak," ta pai ashi.

Foundation Day anogomong nungsa BJP-i sangküm Lok Sabha election atema campaign ka tenzütkogo. Brihostibar anüngdang BJP National Tir, JP Nadda-i campaign tenzütsüba sülen party nung inyakteremi linük tesem lakh 10 dak tema nung jaratem nung yimyim balala- "Ek Baar Phir Se Modi Sarkar" aser "Ek Baar Phir Se Bhajpa Sarkar" zülua toktsüogo.

Party foundation day anogomong nungsa party-i "social justice week" tenzütkogo aser April 14 nü BR Ambedkar asoba anogomong nung tembangtsü.

BJP-i linük nüchiso atema rarar, linük temzüng yanglusang aser Dalit nunger temeden atema inyaksang, Ambedkar nungtem nung sentong balala ayongzüka agütsü.

April 11 nü Party züngsemtemi loktiliba nung temelenshi adokdaksür, Jyotiba Phule nungtem nunga sentong ayongzüka agütsü.

Taoba mapang Jana Sangh-i Janata Party toktsüba sülen lenirtemi 1980 küm April 6 nü BJP party ya tenteta liasü.

Jharkhand school education minister, Jagarnath Mahto süogo

Ranchi, April 06 (Agencies): Jharkhand minister Jagarnath Mahto tamalen tepokpok transplant süa liasü, aser temang nung maneni timtem adoka Chennai nung aliba hospital ka nung treatment tagidak mapang nung süogo; pa arrshi küm 57 liasü.

School education & literacy minister, Mahto 2020 küm November ita nung tepokpok transplant asüba sülen taoba ita temang nung timtem adoka tayimtsü ajanga Chennai-i anir oa liasü.

"Tanü Mahto alima nungi pilaogo," ta MGM Healthcare

nung inyaker, Dr Apar Jindal-i osangbener nem metetdaksü.

Pai jabaso ka den jala pezü toktsür asü.

Mahto ya Giridih district kübok Dumri nungi pezüben tashi JMM MLA liasü. 2020 küm October ita nung pa coronavirus agi shiranga Chennai-i anir aoba sülen November ita nung tepokpok transplant asü, ta health department nungi ketdangser kati metetdaksü.

Pai Chennai nung ita 8 amongba sülen 2021 küm June ita nung Ranchi-i meyipa aru. Mangyim jashi lemsatapa

Jharkhand Chief Minister, Hemant Soren-i, "Takoksa tulu. Tanü Jharkhand-i kanga nungtugu aser meranga inyaker lenir ka akoksaogo. Akhümsüba aliba Jagarnath Mahto Chennai nung treatment tagidak mapang süogo. Tsüngremi asür nem tesünep agüjang aser par kibong nem tashi agüjang ta sarasademtsür," ta lemsatep.

Mahto nem akhüm agüja April 6-7 anogotem nung state-i mangyimtsü aser iba mapang nung official sentong kecha magütsü, ta Jharkhand sorkari sangdong.

China-i Arunachal nung tesem 11 nungja melentsüba India-i magizük

New Delhi, Rongchii/April 6 (Agencies): Arunachal Pradesh nung tesem 11 nungja melentsütsü atema China-i jenjang agiba India-i magizük. Beijing-i Arunachal ya South Tibet ta shia arudar. Iba dak sendakba nung external affairs ministry-i ashiba agi, iba amala jenjang agiba ajanga iba northeastern state ya India nung shilem ka ta asüba memelenshidaksütettsü.

Küm 60 tsüngda India aser China na tsüngda tesendaktep tang tamajungba kümer aliba mapang ka nung China indang civil affairs ministry-i Arunachal Pradesh nung tesem 11 nungja melentsütsü. Ladakh sector kübok Line of Actual Control (LAC) nung mangatettep adokba sülen kidanger linük ana tesendaktep mejungi kümer lir. Tang agi tasembenbuba China-i Arunachal Pradesh

nung tesemtem nungja melentsütsü. China-i 2017 küm April ita tesem trok aser 2021 küm December ita tesem 15 nungja melenja liasü.

Ken o dak sendakba nung external affairs ministry otongdar Arindam Bagchi-i, "Onoki report nguogo. Arunachal nung nungja melentsütsü atema China-i tang mezüngbuba merangdang masü. Onoki iba ya khenyongi magizük," ta ashi

Paisa, "Arunachal ya India kübok liasü aser India kübok lir aser teti India nung shilem ka asütsü. Nungja melenshütsü merangba ajanga ochibaji kechi aji memelenshidaksütettsü," ta ashi.

Taoba mapanga Arunachal Pradesh nung tesemtem nungja melentsüba India-i magizüki aruogo aser iba northeastern state ya India nungi pilatsü

makokba tesem ka ta nenshia metetdaksüogo.

Deobarnü China civil affairs ministry-i ashiba agi, "tesem balala nungja dak sendakba nung State Council (China's cabinet) temzüng ozüng tapet dak ajemdaker ministry aser iba dak sendaka aliba department tem longjemer southern Tibet nung tesem kar nungja melentsütsü."

State meyong Global Times sangdong ka ajanga Hombarnü ashiba agi, civil affairs ministry-i nungja melentsüba tesemtem indang coordinates agütsüogo, kong ali taziung ana, nisung aliba tesem ana, tenem pongu aser ayong ana densema lir.

Chinese Academy of Social Sciences kübok Institute of Chinese Borderland Studies nungi Zhang Yongpan-i, nungja melentsütsü asoshi jenjang agiba ya China indang sovereignty kübok lir, ta ashi.

DIMAPUR ZONE AO OFFICERS TELONGJEM

Lokti Tentetba Senden Sentong (Launching Programme)

Anogo: 8th April 2023, Mapang: 11:00 AM

Tesentepdak : Hotel Saramati, Dimapur.

- Menden : (a). Wb. I. Anungba Sanglir, Convener
(b). Wb. Lanuzulu Aier, Secretary
Organizing Committee.
- Sarasademsü : Rev. Panger Jamir, Pastor
Unity Ao Baptist Arogo.
- Menden Okila :
- Tepela-O : Wb. Meren Nokpu, President,
Ao Senso Telongjem Dimapur.
- Temeja Ken ka : Kr. Moajungla Jamir
- Tajungshi-O : Wb. Sentyanger Imchen IAS,
Addl. Chief Secretary, Govt. of Nagaland.
- Osangtem agütsü : (a). Wb. Imosong Imsong, Convener
Constitution Drafting Committee.
(b). Wb. Marpokba Pongen, Convener
Nominating Committee.
- Ketdangpur tasen asoshi müjeta Sarasademsü : Rev. Dr. Temjen Ozüküm, Pastor
Indisen Baptist Arogo.
- Ketdangpur tasen rongnungi Tepela-O jimbitsü : Tir
- Melepzüng-O :
- Tatem sarasadem : Wt. Aoinla, President,
Dimapur Watsü Telongjem.

METETDAKTSÜR

- Iba sentong nung Dimapur Zone (Dimapur, Chumukidema, Nuiland aser Peren District) kübok aliba Aor officers ajak medema arua atentsü ayongzüker.
- Iba sentong takok tulu ngua mongtettsü asoshi ajaki sarasadema atati.



Office of the
LIONS' CLUB (SANGPU) LONGSA VILLAGE
MOKOKCHUNG, NAGALAND

Konang Tetushi Yimyim

Lensanir Wb. S. Supongmeren Jamir Ex. MLA (S/o Lt. Shilumang Jamir) dak nüber lenitsü sempet ajiteta Nagaland Pradesh Congress Committee (NPCC) nung tokolak asütsü Tir shimba asoshi Lions' Club (Sangpu), Longsa-i pa nem konang tetushi yimyim ayimoktsür. Pa lenisüba nung Naga lima aser nübertem azükarua yimjiyijung nung tejakleni anitsü imla-a atar.

Wadang tuluba nung ajemokdang Tsüngremi asen lenir nem shisatsü den arishi aser anema aliba maneni moajangma ta sarasademtsür.

**Sd/-
Nungsangtemshi
President**

**Sd/-
Limatemshi
Secretary**

FORM NO. 14

[See Regulation 33(2)]

**OFFICE OF THE RECOVERY OFFICER- III
DEBTS RECOVERY TRIBUNAL, GUWAHATI**
Suwarna Bhawan, House No. 12, New Town Path,
Near Hanuman Mandir, G.S. Road, Ulubari, Guwahati- 781007 (Assam)

DEMAND NOTICE

Notice Under Sections 25 to 28 of the Recovery of Debts & Bankruptcy Act, 1993 and Rule 2 of Second Schedule to the Income Tax Act, 1961.

RC / 169 / 2022

BANK OF BARODA (ERSTWHILE VIJAYA BANK)

-Versus-

INAKA YEPTHO

To,

(CD 1) INAKA YEPTHO

Son of SH KHIKITO YEPTHO, Resident of House No. 083 B, ARK House, Walford Colony, P.O. And P.S. East Dimapur, Nagaland, India, Dimapur- 797112.

(CD 2) SHRI H KIYEHOTO YEPTHOMI

S/o Sri S Hukiye Yephthomi, Dimapur, Nagaland- 797112.

This is to notify that as per the Recovery Certificate issued in pursuance of orders passed by the Presiding Officer, DEBTS RECOVERY TRIBUNAL, GUWAHATI in OA/157/2018 an amount of **Rs. 40,81,467.61 (Rupees Forty Lakhs Eighty One Thousands Four Hundred Sixty Seven And Paise Sixty One Only)** along with pendentlite and future interest @17.25% Compound Interest Monthly w.e.f. 01-03-2018 till realization and costs of **Rs. 43,000 (Rupees Forty Three Thousands Only)** has become due against you (Jointly and Severally / Fully / Limited).

(1) Amount due as per the Recovery Certificate:	Rs. 40,81,467.61
(2) Interest from 01.03.2018 to 12.01.2023 @ Rs.17.25%	Rs. 51,25,846.79
(3) Costs	Rs. 43,000.00
TOTAL	Rs. 92,50,314.40

2. You are hereby directed to pay the above sum within 15 days of the publication of the notice, failing which the recovery shall be made in accordance with the Recovery of Debts Due to Banks and Financial Institutions Act, 1993 and Rules there under.

3. You are hereby ordered to declare on an affidavit the particulars of yours assets on or before the next date of hearing.

4. You are hereby ordered to appear before the undersigned on **06-07-2023** at 10:30 a.m. for further proceedings.

5. In addition to the sum aforesaid, you will also be liable to pay:
(a) Such interests as is payable for the period commencing immediately after this notice of the certificate / execution proceedings.
(b) All costs, charges and expenses incurred in respect of the service of this notice and warrants and other processes and all other proceedings taken for recovering the amount due.

Given under my hand and the seal of the Tribunal, on this date: 06-03-2023
RECOVERY OFFICER
DEBTS RECOVERY TRIBUNAL GUWAHATI



TIR YIMYIM

YIMOBILEM (EDITORIAL)

DIMAPUR

ROGONÜ

RONGCHII 07, 2023

Yihuda Iskariot o Asenok na

Tanü anogo ama Yisu Khristai asenok menen alangzüksü asoshi Pa taküm bendanga agütsüba temeim bilemteta amongba anogo nung jet ta asenok mulungjangi Yisu ashioksüsang Yihuda Iskariot jakla aser taküm indang bilema arur. Aji oda, Yihuda Iskariot-i rongsen penbuba agi pai pa tesayur senyong ayokbaji tanü anogo 'Goof Friday' sermon tapu ka lir. Ajisüaka, Yihuda Iskariot-i Yisu ashioksübaji iba kuli kisüngji dangbo masü. Hau, tanüla tsütsü bilemdangra, Yisui Mathi 26:24 nung ashiba ama, Pa ashioksüsangji tia majung dang ashi, akhi tejen putu mapang ainkertemi shina yutsüba Tsüngrem sentong ataloker. Itemji bilemdanga, kodang asenoki asen taküm ya Yihuda Iskariot jakla yimya aser mapatem den medemdangdir asenoka tret ta aoksatsüsa asenok taküma pa den kecha tepila mali kasasa medemdangtetsü. Yihuda nungertemi Yisu anema apusoba mapang ya shibai Pa anema kuli agütsüdir, kechi meshidir aji mulungsua agütsütsüba mapang ka liasü. Iba jagi Yihuda Iskariot-i aginüba ama puti ungerteremi pa nem senpak semer agütsü. Ashiko, asenok asünungbo senpak semer jagi tenük mesüngi ano meshisemla. Aji oda, tanü asenoka Yisu sülen anidaker memesük sen yong asenok temeten ayokba ya koda ? Asenoka Peter, Yohan aser Yihuda Iskariot nunger amaji Yisu sülen anidakertem lir, saka sen angutsü atema asenoki ochimashi mapa inyaker. Ashiko, asenok rongnunga karibo sen angutsü atema nisunga tepseta alitsüa shibaibo metet ? Asenoka Yisu sülen anidakertem, saka senyong asen taküm aser temang dena yoker tasüa majem polling booth nung arüa nokdaker. Ano, Yisu sülen anidaker asenok karbo pei kinunger meyong vote ajak sen agi yoker, tebanga matsüshii ochishia alitsü indang jembia amonger. Ano asenok rongnungsa, tamanger aika Yisu sülen anidakertem toudak nunga len tom nung 'commission' sen teraka danga angutsüsa kümra, Yihuda Iskariot-i parnok temaba takdang nung techiyongdak nung Yisu aser par medemertem toktsür aoba ama, asenoka Yisu sülena kodanga manidak dang amato mapaa meinyak commission senji agizükerbo oadoker. Yihuda Iskariot-i Yisu dak puti ungerteremi repranga lia tebang mesepbaji temeim aser akümtsübu tamaitüsü masü saka Yisu toktsüba tamaitüsü liasü. Aji oda, Yihuda Iskariot-i Yisu toktsüba kuliji bilemdangra, ano sen dangbo masü saka yimten tashi aginüba aser teti 'power' nung aser 'ruling' nung linüba jakla aser tangatetba aliba agi asütsüa akok. Yihuda nungertemi Yisu alimai aruba ya parnok asoshi Rome yimten talenba nungi salar Israel dangi alima yimten yim tanaben shilangba mapang asütsü ta bilem. Anungji, iba Israel yimli nungji Yisu Khristaji chuba ser parnok ano alima nung sentsüwangshiwangshia yimsüsüa alitsü ta bilem. Iba jagiang, kenü Jakob o Yohan na tetsü Salome-i Yisu dangi orr Pai aniba government nung cabinet number 1 aser 2 ji par jabaso ana südakjang ta mepishiba tatalokba ka Mathi tapu 20 nung shia angur. Iba ama Yisui aniba government nung menden raktep tenzükba agi nütsüngtem rongnung mepelatet adokba asenok kasa tapu nung shia angur. Ajisüaka, Yisui parnok dang Pa alima nung aruagi yimsüsüa tenzükdaktsütsü asoshi aru masü saka tenzüksü aru ta langzüba asenok angur. Aji oda, nütsüngtemi imlaba amato masü saka Pai parnok toktsür aotsüba indangang kodang Yisui jembia meso, ashiko Yihuda Iskariot mulungjang nung parnok ya 'power' nung alitsü teimla malia ta bilem südi. Aji oda, power nung melira kodaser 'finance minister' sütetstü ? Iba ama nisungi rongsen (wealth) aser yimten tashi (political power) penbuba agi Tsüngrem nungi piladokba dang masü saka ashioksür. Tangar nütsüng ama Yihuda Iskariot daka taneptsüba aser temenen tanüla aridoktetsüsa tashi aser ain liasü ta Luke 9 nung shia angur. Ajisüaka, Yisu tenüng nung tangar aneptsüsang aser tangar dak nungi temenen tanüla aridoktsüsang to agiang tanübo Yisu sen aser yimten tashi yong ayokbaji kodang bilemdangdir, aji asenokang mesük. Atangji, Yihuda Iskariot asoshi Yisu ayokba sen jagi tashidakang aküm aser pa soseta asü. Pa amaji mekümnüra, asenoka Jim Reeves-i atenba ama, hon aser chuba menden dang nungibo Yisuang shimtsü tanü asentenshia nangzükdi.

OLEMSABANG

Good Friday Osang : Mapunüi apuba kangki

I. Ben Jamir, Missionary At large Aoyim, Dimapur.

Good Friday ya Khristan tamangba yimsü nung kanga tongtipang tatalokba anogo ka lir. 'Good Friday' nung Yisu Khrista Kangki apuba aser pai apuba Kangki nungji pa angeloka meta-a südaktsüba ango lir, aji saka kechiba iba amala anogo dangji Good Friday ta ajar süra, iba anogo nung Yisu Khristai Pa timtem tejashi, maksü arema meimchirtem ajak asoshi temenen nungi alangzüksü mechi Kangki nung pa taküm tenla agüja tepsetdaktsüba ango lir, iba yongji Khristan yimsu otsü nung Good Friday ta ajar. Yisu Khristai apuba Kangki taret aser tasazük ya lir ta asüba tejangja ka maka saka timba kati shia aliba kuli ka shisemer. 1870 nung French nunger architect Charles Rohoult de Fleury ashiba agi Kangki tasazükji metong nung 4 meters (13 feet) aser lenden nung 6 feet liasü, aser tozükji 165 pounds (74 kgs) liasü.

Yisu Khrista tepsetba tensa nung Yihuda imli ya Rome nunger yimsüsüba küpok liasü, anungji Rome nunger yimsü ozüngi melaba ama Yisui ozüng raksar ka ta kümdakja kangki nung tepsettsü asoshi temerenshi Governor Pilate -i obendang agütsü. Ozüng raksar ka tasü mangjibu ali nung meremi arem shururu nemsä chitaktsür, iba yongji shiruru bulua alidak iberi oshi agi Golgotha koba dang tekolak ret ta ajar iba tenemi Yisu tepsettsü anir ao, Iba tenem nung nisung tasü mang shirurui chir yutsüba tekolak teret aika nangdena alidak tesem ka liasü, anungji Yisu tasü mangji shiruru nem chidaktsütsü asoshi iba tenem jagi bener tua yangji kangki nungji meta-a tepset ta angateter.

MEMOLUNGI KANGKI APU :

Yisu Khrista Kangki apur jajadak lenmang dang Aramic oshi nung Via Dolorosa (Way of Sorrow) Tejashiba lenmang ta ajar. Ibai Gatsemen atsüki nung Yisu apuba tesem nungi tenzükter pa temang aremdak leper tashi nung tanendak tesem 14 lir. (14 stations). Yisui Kangki taret aputsü makoktsüsa akümbaji pa kangki taret apuba den ano lisü agi arepba aser tetsüng agi metsü ali nung laodaktsüba den zübu nungi azü aser tesetzü ayimba agi tashi lula kümer külen alang aser ibai tanendak tesem 5 buba nung atalok.

KURINI NUNGER SIMON :

4th Century B.C mapang nungi North Africa nung ya Yihuda nunger aika liasü. Simon ya Alexander aser Rufu na tubu liasü. Mark 15:21. Kurini lima nungi aruba agi pa dang Kurini nunger Simon ta ajar. Simon ya Yirusalemi kümtetstü benjong nung atentsü asoshi arua liasü. Pa asojen tajung aser jetpera den tashi tait nisung ka liasü. Yirusalem yimti teyong nung lokti tulu sentepa alidak tesemji kechi atalok ta reprangdangtsü asoshi aru. saka yangji Yisu Kangki agi neneter ali nung laoa alibaji ngua süngmanga repranga alidang aoksa Rome sepy kati pa tapubang nung nü (spare) teplokja na arung ta jar pa nem Yisui apuba Kangkiji apudaktsü, Simoni Yisu Kangki melenzüka apubaji pai Yisui meima aria bilemba agi melenzüka apuba masü saka memolungi kangkiji apuba liasü. Anungji Simona Yisu ama kesa tatala aser maksü angu.

(Maneni tapak 5 nung...)

Good Friday

C. Walu

(Yashi adok nungi...)

Kü temba amuzüka aoba sülenji kü mulung nung tesünep aser tepela ka aru. Ajungben tembar ka süaka ni pa dak teimla tasen aika dang angu, Talisa kü dak langka agi kongshir ama süngjema melitetba tanela kati ni aramesodaktsü. Iba tepelaji kü kinungtsü aser jabaso ana den lemsateptsü atema ni Yirusalem nungi kidangi ilonga shilang, aser kü chir ana Alexander aser Rufo den kü kinungtsü Sarah dang kechisa atalok item ajak rasaa ashi. Ano ni par asem dang ashi, 'Nebui chubatem madak Chuba indang kangki apuogo' ta ashidang parnoki asüngdang, 'na kangki apuba taah kechi angu?' Ni langzü, 'taahji kü tapu apokzükba zübu aser temulungjang anüpbaji dang liasü.' Saka iba tepelaji kechaia kü dak nungi rakzüka aotsü makok ta ni chichia metet ta ni langzü. Kü chir nati ano asüngdang, 'süra iba nisung jagi tanurtem meimer memeimer?' Ni langzü 'pai ajak meimer.'

Iba tatalokba ajanga onok tepela nüktzü yima ozü kibong tasen kümshi, onoki sarasadem tasen angazük, onok temeim tuluba aküm. Onok nükjidong tajungba aser talangba yanglua inyaktsü tenzük. Iba kangki apuba ajanga onoki tangar yaritsü, aser meimtsü angazük. Onok mapang arogo nung shilem tajung agitsü angazük. Kü tembai apuba kangki apur anogoshia pa sülen anidaktsübaji khuret ama masü, saka ibai temeim mapa ta onoki angateta anogo shia pei kangki apur pa sülen anidaktsü onoki anateta aru.

Tsüngrem Chir Yisu Khristai alima meimchir temenen ajak bener kangki nung angenlokba anogo ya alima nung shitakba atalokba otsüji lir. Niger lima Kurini nunger Simoni kechi tatalokbatem ashi, ya adangji aser shitak atalokba otsüji lir. Iba temoatsüba kangki otsüji alima tatem tonga ashitsü shia aruba Yisu Khristai pa dak amanger ajak nem nongloktsüba nung asenok ajaki shilem agidi arung.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Good Friday Osang : Mapunüi apuba kangki

I. Ben Jamir, Missionary At large Aoyim, Dimapur.

(Tapak 4 nungi...)

Kodang pai Kangkiji apur Yisu dak rangloka reprang, Yisu tenük o pa tenük na indang indanga reprangtep ta otsü zülur kari ashir. Simon dak atalokba amaji adianu aikati Kangki mapuni apuba mapa ya Tsüngrem tenzüktsü asoshi ner arogo nung tenzükba wadang nung ajirua alitsü südi. Ni ABAM nung tenzük dang ni inyaksü mejangraba wadang aika nung Simon ama kangkiji mapunüaka aputsüsa akümba bilemteter saka item Kangki ajak aremzüka apuba to ni asoshi Tsüngremi kü nem asa-a agütsüba maongka temoatsü Kangki apuba liasü ta angateta Tsüngrem tenüng asanger .

SIMON TESÜLEN TIA :

Laishiba nung Simon aser par kibong otsü ya tatongi shia mali. Otsü zülur kari yamai ashir, Simon ya par limai meyipa or lia aodang Yisui pa dak rangloka reprang dang pa tenük O Yisu tenük na indang indanga ajitepa to pa molung nungi kodanga mamadokteti pa temolung anisüngzüka melitet aküm, iba tanela teiembiba jagi tesülenbu pa aser par kibong rangben Khristan tamanger tajung ka kuma pa ordained asü aser Bosara arogo nung Bishop mapa inyaka Tsüngrem asoshi tenyar tajung ka aküm aser osangtajung asoshi taküm agütsür (martyre) aküm. Paul sayutsungia jajaba mapang Simoner kidangsa anenzük ta Pauli shisema lir. Simoner jabaso Alexander temaba putir kimang ta T.Mapa 4:6 nung shia lir. Ano T.Mapa 13:1 Antiok arogo nung Simon ya tenyar ka liasü ta shisema anaur. Peter aser Andrew nung otsü kaket ka nung Simoner jabaso Alexander aser Rufu na ya Tenyar Peter aser Andrew nung den Missionary mapa nung yaritepa inyakba shia lir.

Nüngtoko arogo tebuti Poly Crapi züluba kaket ka nung Simoner jabaso ana ya Missionary mapa inyaka lia osangtajung atema taküm tepsetdaksür (martyre) akümba indang shia lir.

TANELA TEMOATSÜ :

Asen alidak arogo nung naibu akoktsü ta reprangteta ne nem arogo nung tenzüktsü atema dekon mapangsür, Sunday School teacher yamala nung na shimdang aikati nongnanga aser memolungi khuretji agizüker, saka iba wadang nung kodang mapaji inyaka odir aika taküm nung jangra pangra-a aser temoatsü anguba meteta akümer, aser Simon taküm nung ajiruba temoatsüji na aser ner kibong nunga ajangshir.

Taküm nung asen dangi aruba maongkaji tetibu marutsü, saka Simon ama tashi ita aliba tetemien mapang nung Yisu Kangki aputsü maongkaji na alidak arogo nungi arubaia ka asütsü ta angatetiendi. Yisu kangki aputsüji nisung aika atema tasaktiba mapa ka ama bilemstsü südi, saka kodang nai iba kangkiji molungbena agizüka apudir tatem nung iba kangkiji na aser ner kibong nung teti asoshi laishiba nung Yakob tzübu ama kodanga tzü merusepi aliba ama temoatsü tzübu ka ne taküm aser kibong nung teti merusepi lien alitsü. Laishiba otsütem nung mapunüseti apur taküm otsü aika lir. Tsüngremi Yerimia ainkar asütsü ajadang pai ashi, ajiang koda iembitsü ni makok kechiyong ni tanur ka dang Yermia 1:6 saka kodang pai kangkiji mapuni apu, Yerimia ainkar dang ajeba ainkar ta jatetsüsa pai tesüngmangtsü mapatem inyaktet. Yirmia 9:1 Tsüngremi kodang Mosa aja, pai ashi ni O nung tsungro masong aser ni O jembitsü temeli mekiki. Anitet 4:10

Kodang Mosai mapuni kangki aputsü agizüka Tsüngremi tenyaba ama inyaksü tenzük, Israel kin ljep nung küm 430 shi tashi alar tia nung lia Mosa ajanga aniteta aruba otsü ya Laishiba nung tesüngmangtsü sayatenya mapatem inyakbaji Mosa ajanga inyakba angur.

TANELA AINTSÜ ASOSHI :

Aseni meteta aliba mezüng kangki apurtem aser ano asen yimer rongnunga mezüng Kangki apurtem parnok taküm aser semchi semnortem taküm nung temoatsütem indang shisadangba ajanga temoatsü lesson tajung angazüktsü jangratsu koda tongtipang. Asen taküm nung ken timtem aremba, ken tila akümba, ken nungsen aremba ken aremzüka, ken ajemalutsü aremzüks item agizüktsü ya mezüngbu tasak, saka agizüktsü inyaktetra tesülenbu asen nungi tenzük semchir tashi temoatsü kishi tuluka lapoker asütsü. Ano asen tsürapur mapang nung mezüng kangki aputsü asoshi magizükba aser kangki apurtem atala mezüngmeshir taküm otsütem indang shisadanga taküm lesson angazüktsü ya kanga tongtipang ka lir. Iba kesaji kangki mezüngmeshirtem taküm aser kibong nunga kechisa ajirur item ajakji bushidangtsüla. Simoni Kangki melenzüka apuba ya Tsüngremer sentong ka liasu, iba ya ajanga asenok taküm nung Tsüngrem tenzüktsü ajaba ya Kangki khuret abentsü atema lir aser aika atema ibai mapa task asütsü. kechiaser iba yagi taküm nung pei jangragba mapatem aika satema meinyakteti taküm rangpenji azüoker kangkiji aputsüla, saka ibai agizüktsü apura Hon aser taribi aika juli tulu ka nung sünga seper apuloka abenba ama kangki apura Hon aser taribi aika juli tulu ka nung sünga seper apuloka abenba ama kangki apubaji temoatsü juli apuba ta angateta agizüktsü asoshi teti renema alitsüla. Good Friday anogo amongba nung Simoni mapuni kangki apu saka tesülen par kibong koda temoatsü nung Tsüngrem tenzük kotaker senmanger aküm, yamaji asenok tamanger ajak asoshi tayongzüka tulu ka ta angazüka taküm asoshi tatishitsu tajung agitsu iba ocet azünger ajak Tsüngremi mojangma.

ANO GO ABEN TSÜNGREM DEN

Tsüngremer mapang nung amangang (T.Ken 94:1-10)

"Kibuba, tamajungertemi kopika... takok angutsü?" (t.3). Ajaki iba tasüngdangbaji asüngdang. Iba temulung nung shia bilemba o Laishiba nung aiben shia lir. Temeshi nisungtemi ayimtener, "O Kibuba, kobika?" Saul chubai Dawid taküm agitsü arishidang Dawidi iba tasüngdangba aiben asüngdanga liasü, "O Kibuba, Nai nangzükba chuba mendeni ni matudang kobika ni yamai alitsü ? "

Tsüngrem Pa sentong asenok asoshi kar ta ken züluri ashi. Pai asenok sarasadem angashir aser asen nungdak meteta lir. Kechi ataloker Pai shidakji metet. Tamajungeri parnok kübok ajak lir ta bilemer. "Aser parnoki ashir, Kibubai tangua mangutsü, mesüra Yakob Tsüngremi tangateta mangatetter" (t.7). "Onoki kechi inyaker angutsü makok; Tsüngremi kecha meinyaktetsü." Tamajunger tiyazü tamang ibaji lir. Saka ken züluri ibaji apuoktsüba kuli agi langzü. "Shibai tenarong neploktsü, Pai mangashili ma? Shibai tenük yanglu, Pai menguli ma? Shibai kintem o bendanger, oda shibai nisung dang shisatsü sayur, Pai marütsüli ma?" (t.9,10). Tsüngremji asenok dang nungi temeli tatsükba asü? Alima nung kechi ataloker Pai angur. Pai pa nüburtemi ayimtenba angashir aser azüoker.

Mapa ajak asen teka nung ayutsü asenoki bilemer. Mosai iba mapaji inyaker aser pa lisem limai odaktsü aser idakji pa küm 40 Tsüngrem nungi angazüka ali. Na "kopika, Kibuba" ta ayimtentü tia ka nung lir. Tsüngrem dak ranglokang aser tiaji ne dang nungi Pai tajungba metetta lir ta bilemtetang-tali metetta lir. Idangji pa dang ataa liang. Mita liang aser sarasademang. Pai pa tenangzükbatem ayutsü ta nai jangjatsü.

Tsüngrem inyakyim aser mapang angazüktsüji taküm tepiyong mapa lir. Kodang nai Tsüngremi inyaksü asoshi aremzüka atatsü nungdakdir, Pa dak mezüngbuba ranglokang aser Laishiba nung Pa tenangzükbatem nung azüitang. Idangji Pai anebaluba nung anisüngzükang. Pai ne tia metet aser Pai pa otem ayur. Pai mapang tetemsü nung inyaksü.

Punjab nung Khristantemi yimtenren party ka tentetogo

April 06, 2023: India kübok Punjab state nung denomination balala nungi Khristan lenirtemi longjemer yimtenren party tasen ka tentetogo; Parliamentary menden ka nung takok anguba ajanga Khristantem tajangzük angutsü nükjidong nung party tasen tentet.

April 03, 2023 nü Khristan lenirtemi United Punjab Party tentet.

Jalandhar parliamentary constituency nungi MP süadokba ajanga iba menden tazüng aküm aser kobi melii by election agitsü.

Open Door Church nung pastor, Harpreet Deol-i, party tasenba ya denomination balala nungi Khristan lenir 1,000 dak temai pusemer, ta metetdaksü.

Jalandhar nung kanga sensaker Dalit nung Khristantem aika lir. Iba Parliamentary menden atema by election May 10 nü agitsü aser election agiba osangji May 13 nü sangdongtsü.

April 5, 2023 nü osangbenertem den jembidang Jalandhar nung apostolic administrator, Agnelo Rufino Gracias-i, "India ya democratic linük ka lir, anungji party ka tentetsü atema onok dak temeden lir. Anungji Khristan lenirtemi iba maparen achaayanga inyakba atema pelar," ta ashi.

Pai ashiba agi, India nung Khristantemi yimtenren party tentetba ya tang mezüng masü, ajisüaka pusemer peria maliba agi takok mangu.

"Tang tentetba party tasenba tiaji tarutsü nung ang metettsü. Secularism pusemer tanga party tem teyari onoki nungdaksü," ta Khristan lenirisa ashi.

Punjab nung pastor Hanook Bhatti-i, "Party tasen ka ya nungdaka liasü, kechiyong onoki adokba ola mangashir aser tongti yimtenren party temi onok mezüngshir," ta ashi.

Paisa, tatishitsu agi, Punjab nung ruling party- Aam Aadmi Party-i Khristantem dang Jalandhar nung Khristantem tasü mang aremstsü atema ali agütsütsü, ta nangzükba liasü saka yaküm AAP-i sorkar akümba sülen parnoki nangzükba amai meinyaker, ta ashi.

Delhi nung Federation of Catholic Associations Tir, A C Michael-i, "Punjab nung Khristantemi tashiyim mashia tangartem yimsü meyipdaksür, ta tiyazü nung tai tongloktsür, anungji party tasenbai ibaji tebilemstsü onük atema maongka angutsü akok," ta ashi.

Nütsüng million 28 aliba Punjab state nung Sikh nung nütsüng teimba lir aser state nütsüng shilem 10 shi dang Khristantem lir.

**AO OSHI ANGAZÜKDAK:
TANÜ ANGAZÜKTSÜBA OJANG**



Pokna

(adj) tekongra, pok agi matu (weak due to malnutrition)
* Ayawara mapang tanurtem aika pokna küma aiener.

Poknung

(n) tepok nung aliba temang shilem balala (entrails, innards)
* Asenoki nashi aser ak poknung kanga sapua achir.

OLONG PAITEP # 6480

1		2				3		4
				5				
6								
				7	8			
		9						
10						11		
12		13						14
					15			
16								
								17

TIPIEN

- 1. Aiben - (4)
- 5. Amua onüba yimya - (6)
- 6. Tekabu amtep - (5)
- 7. Yashi aonung - (6)
- 10. Lapok - (4)
- 11. A _ _ _ _ r - (4)
- 12. Azü ajemba shiruru ka - (6)
- 15. Bendanglen nungi arur - (5)
- 16. Ku mali - (6)
- 17. Bangsemo endok - (4)

LANGTSÜNGLEN

- 2. Aika - (4)
- 3. Menur - (4)
- 4. Kinüngtsü maliba tambur - (9)
- 6. Khuret - (9)
- 7. Jila tulu - (5)
- 8. Kasa - (4)
- 9. Tsük nungi sentetba - (4)
- 13. Tekolak angüma aluba - (4)
- 14. Tzü shiruru ka - (4)

OLONG PAITEP # 6479 TELANGZÜBA

TIPIEN :

- 1. Aben, 4. Artsü, 7. Lisem,
- 8. Liwa, 9. Sarasadem,
- 12. Aket, 14. Mangu, 15. Anünü,
- 16. Ango.

LANGTSÜNGLEN :


- 1. Aruli, 3. Balala, 5. Suwar,
- 6. Belem, 9. Sүjak, 10. Aonung,
- 11. Dokan, 13. Tinu.

NAI-A YA METETTER MA



US lima Texas state nungbo shingaia pa/la ket nung 'pliers' bener jajatsüji ozüngi memelar. 1800's nung nüburtemi 'pliers' amshia merang atsü mejepdang külen taküm shiruru auya benersa aoba ajanga iba ozüng yanglu südi. Texas nungsa tila tanurtemi tapi agi tereprangtsü mejungi kuo mejepsüji ozüngi memelar. Ano yimdong nung nüburtemi tetsüng agi jajadak metzü metsüdoktsüji ozüngi memelar.

Noksa nung meputepi aliba 10 bushiang



Mizoram: Chakma council elections May ita agitsü

Aizawl, Rongchii/April 6 (Agencies): Mizoram kübok Chakma Autonomous District Council (CADC) election May ita agitsü.

Iba osang ya Mizoram state election commissioner (SEC) Laima Chozah-i Brehostibarnü (April 6) metetdakja liasü.

Chakma council elections atema anogo tejangja iba ita tatemlen metetdaksütsü, ta Mizoram SEC-isa metetdaksü.

Mizoram nung Chakma Autonomous District Council (CADC) election ya züngsem 20 atema agitsü.

"CADC elections May ita agitsü," ta Mizoram SEC-i ashi.

Temetetsükaji tang inyaksangshia aliba council indang term ya May ita mezüngbuba hopta

tembangtsü. Chakma Autonomous District Council (CADC) elections nung tetsür 17,677 densema voter 35,885-i shilem agitsü imlar.

Vote ya Mizoram nung Chakma council kübok aliba polling stations 70 nung agütsütsü.

Chakma Autonomous District Council (CADC) ya Chakma nungertem atema autonomous council ka lir, koba Constitution of India sixth schedule dak ajemdaker April 29, 1972 küm tenteta liasü.

Iba council yagi CADC kübok aliba tesemtem nung parnok nem lemezükja aliba department tem nung legislative, executive aser judiciary tashi amshir.

CADC kübok ali 686.25 square kilometers lir, koba Bangladesh aser Myanmar arrtsü nung amenoka lir. Iba tesem nung nütsünyongsük 62,094 lir, koba Mizoram nung Chakma nung nütsünyongsük shilem tesadang ka asütsü.

CADC indang headquarter ya Kamalanagar nung amenoka lir aser chief executive member (CEM) tekolak ser executive members (EMs) temi inyakyim ajak achaayanger.

Chakma council nung members of district council (MDCs) 24 lir aser item rongnungi züngsem 20 CADC kübok MDC constituency 20 nungi shimmer aser tanungba züngsem 4 ya Mizoram Angh-i shimmer.

Manipur: Duty nung aliba police amak; nisung 3 apu

Imphal, Rongchii/April 6 (Agencies): Bodhbar aonung Manipur yimtiba Imphal nungi km 11 shi pilar national highway 102 kübok Lilong apu nuka aliba Manipur police personnel tem dak lanur ishikati injang khalokja liasü.

Police personnel tem amakba sülen lanurtem ya parnok mena aliba gari nung aritepa Imphal leni jena oadok. Ajisüaka iba lendong nung nisung asüba osangbo kecha

mali, ta Manipur police-i Brehostibarnü sangdong ka ajanga metetdaksü.

Iba lendong atalokba sülen red alert agütsü aser Singjamei police station, Lamsang police aser Toupokpi police outpost tem nungi Manipur police commando team temi item nisungtem ya aputsü atema arishia liasü.

Iba sülen Manipur police commando team temi police amakertem ya pua liasü.

Bodhbarn aonung 11:15 ako

nung Manipur University anasa Maibam Leikai temeket nung lanur asem pua liasü.

.32 revolver ka den injang asem aser injang tazüng asem parnok ket nungi nguteta liasü, ta police temisa metetdaksü.

Ken o nung aija pua alirtem ya Thokchomg Gyanendra (26), Ingudam Denny (23) aser Augsta (23) ta jangaogo.

Police tem dak injang khaloktsüba ken o ya tang bushisüngdang tesüdak lir.

Morigaon Gram Panchayat secretary sübokrem meshia lia apu

Morigaon, Rongchii/April 6 (Agencies): Assam nung Directorate of Vigilance aser Anti-Corruption (DV&AC), Assam personal temi gram panchayat secretary ka puogo.

Assam kübok Morigaon district nung sübokrem meshia agiba atema gram panchayat secretary ya Brehostibarnü pua liasü.

Pua aliba gram panchayat secretary ya Mukut Chandra Kumar ta jangaogo.

Kumar ya Assam nung

Lahkarghat gram panchayat secretary mapang inyaka liasü.

Ken o ashishsang ket nungi sübokrem sen 30,000 meshia agia aliba mapang pa pua liasü.

Ki yanglushiba atema check agütsütsü asoshi panchayat secretary yagi ken o ashishsang dang sübokrem meshia liasü.

Kasa mapang nung Bodhbarnü Assam kübok Nagaon district nung sübokrem meshia agiba atema Assam police sub-inspector ka puogo.

Aija aliba sub-inspector ya sübokrem meshia agia lia Directorate of Vigilance aser Anti-corruption (DV&AC), Assam team kati pua liasü.

Aija alisang ya Suruzul Haque ta jangaogo.

Haque ya Nagaon police station nung sub-inspector ka liasü.

Ken o bangdaka aliba ka dak sendakba nung sub-inspector-ba yagi ken o ashishsang dang sübokrem meshia liasü.



Likabali, April 6: - Arunachal Pradesh Deputy Chief Minister Chowna Mein, tanü Likabali nung Galo kin Mopin benjung nung tongti tesemdang ama shilem agiba mapang tangokba noksa nung angur. Benjung mapang pai sobaliba inyakyim balala nung shilem agia liasü. Paisa, Likabali nung Ganggi ta nungja agütsür aliba sarasademba tesem ka semdang, kong pai iba tesem yimji yimjung atema sarasadema liasü.

Küm 7 sülen Iran aser Saudi Arabia na sensaksem kaogo

Riyadh, Rongchii/April 6 (Agencies): 2016 küm sülen tang mezüingbuba Iran aser Saudi Arabia foreign ministers officially sensaksem ka kaogo. Video ka ajanga Hossein Amir-Abdollahian aser Prince Faisal bin Farhan Al Saud na Beijing nung China foreign minister matsüingdang salemba nguogo.

Külem sangdong ka ajanga ashiba agi, parnoki ita ana tsüingda diplomatic mission tem lapoktsü aser linük ana tsüingda tayimtsü senzüsenpong tenzükshitsü atema mapang nung US aser Saudi na kümtem tsüingda tesendaktep mejungi kümogo aser Iran denbo küm 40 shi tesendaktep kecha mali.

France tir Macron aser Xi na ajurutep

Beijing, Rongchii/April 6 (Agencies): Tir Emmanuel Macron-i China tir Xi Jinping den Brehostibarnü Beijing nung ajurutepogo. France nunger lenir yagi Russia-i Ukraine amakba pu masemtsü atema China ajungmesotsü meranger.

Linük yimtiba nung o jembiba mapang Macron-i, tang mangatettep adoker aliba bentettsü atema yimjung asoshi lenmang ka bushitsü asoshi Beijing-i tongtibang shilem agitettsü ta ashiba den China-i bangzüing ka yanglutsü atema mulunga aliba atema pelaba lemsatepa liasü.

France tir shiba anogo asem atema Bodhbarnü Beijing tonga liasü pai linük yimtiba teyongtsü nung amenoka aliba Great Hall of the People kima XI den salema liasü.

Kasa mapang nung Xi-i red carpet ka nung Macron

Taoba ita China-i achaayanga tenangzüktepa yangluba sülen linük anapronglai tesendaktep yanglushitsü atema mulunga agizüka liasü. Iba jenjang agiba ajanga Middle East nung China-i shilem taliba agiba temaitsü sayur aser iba tesem US-i amokbanger aliba dak sendakba nung tetsükdaktsüka ama reprangteter. Saudi Arabia aser Iran naprongla den China tesendaktep tajung lir aser kasa (Maneni tapak 8 nung...)

agizükba mapang linük anaprongla indang wako tarensena songa liasü aser linük anaprongla indang naklo ken tema liasü, ta AFP osangbener kati metetdaksü. Ukraine nung yimjung bener arutsü atema anüolen aliba linüktemi China kanga nongshia arudar. Beijing shinga dena dena mali ajisüaka Russia-i Ukraine (Maneni tapak 8 nung...)

TEPELA LEMSATEPER

Changki yimtsüing nung aliba schooltem (GHS Changki, Mission School, GMS Sangpangmen, GPS Tekongkulem, GPS Aodang) tenüing nung Proprietor of P.C Garage Mokokchung, Mr. Toshiakum Longchari S/o Lt. Dr. Imtinungshi Longchari, school shia nem computer set angati tenlaba asoshi tepela lemsateper. Tsüingremi ne wadang maneni moajangma.

School ajak tenüing nung,
Rampukar Prasad
Headmaster
GHS Changki

GOVERNMENT OF NAGALAND
DIRECTORATE OF WOMEN RESOURCE DEVELOPMENT
NAGALAND, KOHIMA

NO.DWRD/DEV/MTC-4/2021/159 Dated Kohima, the April, 2023.

ADVERTISEMENT

The Department of Women Resource Development invites applications for female candidates who are indigenous inhabitants of Nagaland and are willing to undergo 6 (Six) months course programme for enabling self employment at Multi Training Centre (MTC), Directorate Compound, Meriema, Kohima and Multi Training Centre (MTC), Purana Bazaar, Dimapur in the Trades of Tailoring and Knitting.

Application addressed to the Director, Women Resource Development in plain paper stating bio-data, 2(two) recent passport photographs, self-attested copies of relevant mark sheet, birth certificate and any other relevant documents are to be submitted.

For Kohima, MTC

- Application to be submitted at Directorate Office, Bayavu Colony, Kohima on or before 19th April. 2023.
- Interview will be held at MTC Meriema (near Nagaland University) on 21st April, 2023 from 10:30 am onwards.
- All intending candidates to be at the Centre by 10:00 am.
- One seat will be reserved for people with disabilities (PwDs). If not filled by the PwDs the seat will be allotted to the general category.

For Dimapur, MTC

- Application to be submitted at MTC, Purana Bazaar, Dimapur on or before 19th April. 2023.
- Interview will be held on 21st April, 2023 from 10:30 am onwards.
- All intending candidates to be at the Centre by 10:00 am.
- One seat will be reserved for people with disabilities (PwDs). If not filled by the PwDs the seat will be allotted to the general category.

Eligibility:

Education Qualification : a) Class VI Passed for Knitting
b) Class VIII Passed for Tailoring

Age : 18 to 35 years as on 1st May 2022.

Sd/-
(VILONE SAKHRIE)
Director

Office of the
ANAKIYIMSEN BAPTIST CHURCH
P.O. Tuli, Dist. Mokokchung, Nagaland
Pin -798618

TENÜNGSANG AGÜTSÜR

Anakiyimsen Baptist Arogo ajanga Sensosanger rongnungi Rev. Dr. Olemniüingsang Jamir (Wb.Imlionen Jamir aser Wt. Merenchila Lemtutr) Jabasoi Tsüingremer wadang nung taktüm tepiyong tenzüktsü tenangzükba tulu nung Nagamese Baptist Churches Association (NBCA) ajanga 26th March 2023 anogo nung Reverend Ordained asüba tenüing nung pelaba den Pa nem konang tetushi tulu agütsür. Tsüingremi Pa aser Par kibong tenzükba wadang nung maneni moajangma.



Kibubar wadang nung,
Sd/-
(Mr. Temjen longkumer)
Pastor Anakiyimsen Baptist Arogo.

Menungra Bilemteter



Temeim Asür Rongsentemshi (Yaongyimsen)
07.04.2022 - 07.04.2023

Küm ka tejaklen iba anogo nai onok toktsür tatem makaba tepela limai ogo, saka ne tesüingjem, taremzük aser shisatsü tajung onoki kanga menungrar aser kodanga mamateter. Ne temeim onok nükla dangi arur aser iba anogo onoki sarasadema amonger. Tsüingremi ne tanela anisüingzükdak lidakjangma.

Temeim kinungtsü, chirmur aser kinungertem

4th Mokokchung Inter-Ward
Football Tournament
Organised By: Marepkong Youth Association
Theme: Toward Excellence
Venue: Imkongmeren Sports Complex
Date: 10-04-2023 Time: 11:00 Am

Inaugural Programme

Guest of Honour : Dr. Sentitula, IFS
Division Forest Officer,
Mokokchung, Govt. of Nagaland

Compere : Ms. Talinaro & Ms. Supongtila

Invocation : Mr. Puryapang,
Pastor, Yimyu Baptist Church

Unveiling of MIWFT Trophy :

Welcome Address : Mr. Bendangnukshi,
Convenor, MIWFT

Special No. : Moamerenla Jamir
Note Grid School of Music, Mokokchung

Exhortation : Mr. Lanuakum
Chairman, Salangtem Ward

Speech by
Guest of Honour :
Ceremonial Oath : Mr. Limatemjen Pongen
of the tournament President MYA

~ Kick Off ~

Office of the
AO SENDEN LITERATURE BOARD (ASLB)
MOKOKCHUNG - 798 601, NAGALAND
Dated: 05/03/2023

ASLB SANGDONG

Yangi ASLB nungdaktem kar yamai metetdaksür. Ao Senden Literature Board-i achaayanga agiba Arangtet Tatidang 2023 Shiyim Rongchii 10, 2023 anogo nungi tekübook agüja aliba tesemtem nungi angutsü;

a) Kohima Mr. Aotemjen Jamir (M/No. 8731821467)
b) Dimapur Mr. P. Alem Jamir (M/No. 7005501457)
c) ASLB office (9436436180 & 9089816427)

Item tesem nungji tongtepratepa tatidang shiyim agitsü akok aser Rongchii 30, 2023 tashi nung Office tongtsütsüla.

Sd/-
Rev. Prof. Rongsen Longkumer
Convener, ASLB/AC

Sd/-
I. Temjen Tzüdir
Secretary, ASLB/AC

AIFF-i Technical Director asütsü Syed Sabir Pasha shimogo

Rongchii/April 6, 2023 (Agencies): All India Football Federation (AIFF)-i AIFF Technical Director (TD) mapa abentsü atema taoba mapang India nung international asayar Syed Sabir Pasha shimogo. Pa ya India nung rongnung full-time basis nung iba mapa agizükba mezüngbuba lir.

Küm aika domestic aser international jenjang nung asayar aser coach ama tajangshiba balala Pasha-i bener arutsü.

Pasha pelashishia agizüka AIFF tir Kalyan Chaubey-i, "Indian Football tejkadangi anir aotsü atema Sabir Pasha onok den densemba atema kanga pelar. Pai tajangshiba aika bena lir aser pai asayar aser coach

ama shilem balala agiogo, anungji iba mapa atema pa tetemsü lir," ta ashi.

Kasa mapang nung General Shaji Prabhakaran-i, "Sabir Pasha-i kanga junga inyaksü imlaja atar. Pa dang senior pro Vincent Subramanyam-i len sayutsü, shiba Chief Technical Officer lir. Tena lenisüba nung technical team tashi tait ka amenoktsü aser iba ajanga India nung football asaya tejkadangi ania 'Vision 2047' ajangzükttetsü," ta ashi.

Pasha mezüng National Team nungi 1993 Nehru Cup nung asaya aser asaya 12 asaya liasü. 1995 küm SAF Games nung Bangladesh den Chennai nung asayaba mapang pai tongtibang goal ka idaktsüba

ajanga India nung football asaya meimertem rongnung pa kanga nungtugu lir. Pasha-i 1993 aser 1995 küm Nehru Cup, 1995 SAFF Cup, 1995 SAF Games, 1996 Asia Cup Qualifiers aser 1996 World Cup Qualifiers amala international asayamungtem nung shilem agiogo.

Pasha asaya aliba mapang 1995 SAF Games nung gold medal angu aser 1995 küm SAFF Cup nung tanabuba jenjang nung tembangba team nung densemba liasü. Paisa, 1994 küm (goal 6) aser 1998 küm (goal 9) Golden Boot ngua liasü. Pai Tamil Nadu tenüng nungi Santosh Trophy asayaba mapang goal 26 idakja liasü. Club jenjang nung pa Indian Bank nungi asaya liasü.

FIFA Rankings: Argentina temaba jenjangi tuogo

Rongchii/April 6, 2023 (Agencies): World Cup akokba Argentina team Brehostibarnü sayaba FIFA rankings nung temaba jenjangi tuogo.

Küm trok tsüingda tang mezüngbuba parnok temaba jenjangi tuogo.

Taoba ita friendly asaya ana akokba sülen temaba jenjang nung Argentina-i Brazil atsüngtokogo, shirnok Morocco goal 2-1 agi makokba sülen tasembuba jenjangi asepzüka luogo.

World Cup finalist France

team jenjang ka tejkadangi tua Argentina sülen tang tanabuba jenjang nung lir. Parnoki European Championship qualifiers nung No. 6 nung aliba team Netherlands aser Ireland na atonga koka liasü.

Belgium pezübuba nung lir aser parnok sülen England team pongububa nung lir shirnoki 8buba nung aliba Italy koka liasü. Top 10 nung 7buba nung Croatia lir aser parnok sülen Italy, Portugal aser Spain lir.

Morocco, shirnok 2030 World Cup ayongzükba asayatsü atema Spain aser Portugal den

densemogo parnok tang 11buba nung lir aser Africa nungi team tem rongnung parnok temaba jenjang nung lir.

United States pur maneni Mexico jakdang 13buba nung lir. Kasa mapang nung 2026 World Cup ayongzükba linüktem rongnungi Canada team jenjangi trok tejkadangi tua tang 47buba tongtetogo.

Maneni Japan team 20buba nung lir koba Asia nung team tem rongnung jenjangi tajungba asütsü aser 2022 World Cup host Qatar jenjang 61bubai asepzüka luogo.

Küm 7 sülen Iran aser Saudi Arabia...

Parnokisa kati ka semdangtepba asüingsashitsü atema sensaksema liasü. Iran nung ketdangsür kati iba ita tetenzükken ashiba agi, Chuba Salman bin Abdulaziz Al Saud-i Saudi Arabia semdangtsü atema jaokba tir Ebrahim Raisi-i agizükogo.

Küm tenet tejkadangi Tehran nung Saudi Arabia indang embassy lokti kati amakba sülen Saudi-i Iran den tesendaktep mayutsü atema telemtetba agia liasü. Iba sülen Saudi Arabia-i nungtugu Shia Muslim cleric ka tepseta liasü. Iba tatalokba sülen linük ana tsüingda tensa mejungi aruogo.

Middle East nung linük ana tsüingda tesendaktep yanglushiba ya mimlaba inyakyim ka aser China asoshi takok tulu ka lir.

Küm ti tejkadangi Saudi

Crown Prince Mohammed bin Salman-i anir par linük arrtsü adena orr Yemen nung rara tenzükba sülen tang iba jenjang agiogo. Yemen nung Iran-i teyari agütsüba Houthi telungpurtem samatsütsü atema parnok iba rara nung shilem agia liasü.

Saudi nung lenirtemi Iran den tsükchi ayimba ajanga parnok akoksatsü ta angateta aruogo, kechiyong Iran indang military kanga tashi ita kümogo aser parnok ket nung missiles aser proxy militias aika lir, koba Saudi Arabia aser parnok den sendaktepa aliba linüktemi akoktsü tasak asütsü.

Maneni Riyadh joko Washington dak metaloker melitetsü. Linük ana tsüingda tesendaktep liaka tamang makatepi kümogo.

Saudi nungertemi tir Donald

(Tapak 7 nungi...)

Trump kanga sakloka liasü shibai 2017 küm mezüngbuba bendanger linüktem rongnung Riyadh semdanga liasü. Iba masüdang parnoki tir Barack Obama dak tamang makateti liasü.

Tanü tir Joe Biden den tesendaktep mejungi kümer lir, kechiyong US-i mepeshiaka Saudi-i oil production tajemba kümtsüogogo aser pump tem nung jenjang timba ajungkettsüogogo.

Anungji Saudi aser Iran na tenangzüktepba yangluba ya Riyadh-i pasasa lenmang mesapoka aoba temaitsüka ama reprangteter.

Saudi Arabia kong Sunni Muslim nung timba lir aser Iran kong Shia Muslim nung timba lir, iba linük ana ya küm aika parnok meketa aliba linüktem amokbangtsü atema toktepa aruogo.

France tir Macron aser Xi...

Macron shiba European Commission chief Ursula von der Leyen-i meiner oa liasü pai ashiba agi pa ya Ukraine dak sendakba nung Europe longjemdaktsüba ola ka kümner aser China-i la den külemi aruba ya iba nükjidong ataloktsü atema lir, ta ashi.

Brehostibar anepdang Great

Hall of the People nung Chinese Premier Li Qiang den senden amenba mapang Macron-i, tensa mejungi aliba mapang China aser France na sensaksem koda tongtibang iba indang lemsatapa liasü.

"Külemi longjemer ken o asadangtsü aser arok lenmang ka mesapoktsü kanga

tongtibang," ta pai ashi.

China-i Taiwan kanga nongshiba mapang ka nung tang Macron-i China semdangogogo. Taiwan tir Tsai Ing-wen-i California nung US House Speaker Kevin McCarthy den ajurutepa sensaksema ajanga China mepelai aliba mapang ka nung pai iba linük semdang.

Orleans Masters: Rajawat-i top Seed Nishimoto tsükdaksü



Rongchii/April 6, 2023 (Agencies): Brehostibarnü Orleans Masters Super 300 badminton tournament tebur kija asaya nung India nung asayar Priyanshu Rajawat-i Japan nung top seed asayar Kenta Nishimoto straight set nung koka quarterfinals tongtetogo.

World number 58 Rajawat-i pa sempet aser tasa kanga junga sayua world no. 12 Nishimoto 21-8 21-16 agi koka liasü. Nishimoto-ia taoba Deobarnüang Madrid Spain Masters koker liasü.

National champion Mithun Manjunath-i Chinese Taipei nung asayar Chi Yu Jen kokra quarterfinal nung India nung ana asayaba angutsü.

Rajawat shiba Thomas Cup akokba India team nung züngoksema liasü, pai asaya tetenzük nungi kanga junga asaya aser mezüngbuba game nung pa 10-0 agi tejkadangi aküm. Kasa mapang nung Nishimoto-i kanga meranga

asayadangi ajisüka pai iba game nung point 8 dang nguteta liasü.


Court melentetba sülen tanabuba game nung Japan nung asayar ya 6-2 agi tejkadangi aküm, ajisüka Rajawat-i pa menepa asaya aser point 10-10 aküm.

Nishimoto point ka anuba sülen break agi, iba sülen India nung asayar yagi kanga junga asaya 16-11 agi pa tejkadangi aküm.

Japan nung asayar yagi maneni kanga meranga asayadangi ajisüka Rajawat-i pa ajateta atutsü atema maangka kecha magütsü asaya koka liasü.

Tetsür kija asaya nung Tanya Hemanth Japan tsür Natsuki Nidaira den asayatsü aseer tarep asaya MR Arjun-Dhruv Kapila, Tanisha Crasto aser Ashwini Ponnappa, aser Sai Pratheek K aser Tanisha nung ajak iba asayamung nung shilem agidar.

Williamson ODI World Cup nung masayatetsü akok



Rongchii/April 6, 2023 (Agencies): Indian Premier League nung Gujarat Titans nungi asayaba mapang temekok yiruba sülen New Zealand nung asayar Kane Williamson taruba ODI World Cup nung masayatetsü akok.

50-over World Cup ya India nung October 5 nungi November 19 nü tashi asayatsü.

Fielding amenba mapang anterior cruciate ligament shisaba sülen pa surgery agitsüsa kümogo.

Black Caps coach Gary Stead-i ashiba agi, arishi küm 32 tain asayar ya ODI World Cup nung asayatsüsa renema

matatetsü, koba October ita tenzüktsü.

Williamson masayatetba ya New Zealand team asoshi kanga takoksa asütsü, shirnoki tang tashi nung World Cup ka danga koka mali ajisüka taoba asayamung ana nung tanabuba jenjangi tongtetata asayaogo.

"Yimya agi yiruba ya tezüdakngtsüka, ajisüka ni surgery agir rehab tenzüktsüba dak rangloker lir," ta Williamson-i ashi.

Taoba hokolbarnü mezüngbuba asaya nung ball ka aputsü merangba mapang pa temekok yirua liasü.

Pa ya alima nung cricket asayartem rongnung batsmen tajungtiba rongnung ka lir.

2019 World Cup nung par team final tonga asayaba nung pai kanga tongtibang shilem agi. Iba asayamung nung pa nem player of the tournament naroküm agüja liasü.

Williamson-i Test captain mapa toktsüogogo ajisüka pa lenisüba nung Kiwi team ODI aser T20 bo asaya arudar.

BILEMDANGANG

"Shisabulu kazüba agi ken o mebenteter."